


Det kongelige Fiskeri- og Kystdepartementet
v/Lisbeth Belg Hansen
Postboks 8818 Dep 0 2. 11. 2012
0032 OSLO

SAKSNR.
ARKIV

KYSTORDFØRERAR TIL KAMP FOR SEINOTFISKET



I Høyringsnotat av 12. oktober 2012 går Fiskeri- og Kystdepartementet inn for å innføre eit minstemål for sei, gjeldande for alle fartøygrupper på 45 cm nord for Stad og 40 cm sør for Stad.

Dette framlegget er ein direkte trussel for fiskeriarbeidsplassar og fiskerisamfunn langs kysten av Sogn og Fjordane fordi:

- Seinotfisket skjer langs kysten før seien vandrar ut i ope hav. Havforskninga og kystfiskarane er samde om at seien i all hovudsak vil vere vandra ut av dei mogelege områda for kystnotfiske før han når det nye minstemålet.
- Notsei er hovudproduktet til to kvitfiskverksemdar på kysten av fylket vårt – Bulandet Fiskeindustri på Bulandet i Askvoll og Brødrene Larsen i Kalvåg i Bemanger. For Bulandet Fiskeindustri er 75% av råstoffgrunnlaget levande småsei fanga med kystnotfartøy. Utan dette råstoffet er det overhengande fare for at 25 fiskeriarbeidsplassar i Bulandet vert nedlagde. Dette framlegget truar såleis livskraftig fiskerisamfunn lengst vest i Norge.
- Seifisket er ei viktig inntektskjelde for kystnotflåten. Inntil 30% av driftsgrunnlaget kjem frå dette fisket. Sjølv om kystnotbåtane skulle få full kompensasjon gjennom nye kvotar på sild og makrell, vil nedlegging av det kystnære seifisket tvinge kystflåten til å drive framandfiske i ein endå større del av året. Dette svekker tilknytninga til fiskerisamfunna langs kysten, og kan etter kvart true eksistensen til desse kystsamfunna.

Framlegget kan skade miljøet fordi:

- notsei vert fanga nær industrianlegga med låge driftsutgifter og små miljøutslepp
- notfisket er meir selektivt (målretta mot fangstressursen) enn andre fiskeri
- nota set få eller ingen spor på havbotnen
- notseien sin kvalitet gjev grunnlag for lokal sysselsetting og lokal foredling i motsetning til trålseien som i større grad vert frakta til foredling i Kina og andre lågkostland.

- foredling ved norske landanlegg medfører – i motsetning til foredling til havs - 100% råstoffutnytting der restavfall vert teke vare på og nytta som proteinrikt dyre- og fiskefor.
- uttaket av notsei er oversiktleg og lett å regulere, medan vi har langt dårlegare oversikt over småseien som vert teken som bifangst i trål eller utsett for EU sitt gjenutsettingspåbod.

Framlegget gjev eit skeivt bilete av den samla verdiskapinga fordi:

- departementet einsidig baserer seg på ei samanlikning av førstehandsverdien på sei. Når notseien vert levert rund til fabrikk, er prisen sjøvsagt lågare pr. kilo fordi ein større del av bearbeidinga skjer på land.
- den høge utnyttingsgraden som notseien oppnår ved bearbeiding i norske landanlegg, gjev ei verdiskaping som ikkje kjem fram i ei enkel samanlikning av førstehandsverdien.
- vi ikkje får presentert vurderingar av verditapet som følgje av auka bifangst av småsei i industritrål og småsei som blir "gjenutsett" av EU-båtar.

Ordførarane langs kysten av Sogn og Fjordane vil difor samla protestere mot det nye minstemålet for sei som Fiskeri- og kystdepartementet gjer framlegg om nord og sør for 62°N.

Ordførarane er derimot ikkje negative til at det vert arbeidd vidare med å finne ein god balanse mellom trålfanga og notfanga sei innanfor ei berekraftig totalforvaltning av seibestandane.

Dette arbeidet må bygge på ein gjensidig respekt mellom fartøygruppene. Det må gjerast ei langt grundigare verdianalyse av det samla seifisket enn det som no ligg føre, og det må gjerast ei breiare drøfting av bestandsutviklinga enn ei snever vurdering av minstemålet. I tillegg må det gjerast ein langt større innsats enn hittil for å berekne bestandsbelastningar som følgje av "gjenutsetting", bifangst i industritrål og seismikk.

Hallvar Oppedal
Ordf. i Gulen(sign)

Jan Gjerde
Ordf. i Hyllestad (Sign)

Ole Gunnar Krakhellen
Ordførar i Solund (sign)

Arve Helle
Ordf. i Fjaler(sign)

Frida Melvær
Ordf. i Askvoll(sign)

Bengt Solheim- Olsen
Ordførar i Flora(sign)

Karl Vidar Førde
Ordførar i Bremanger (sign)

Morten Hagen
Ordf. i Vågsøy (sign)

Ottar Nygård
Ordførar i Selje(sign)